

ԱՍՏՎԱԾԱՇՆՁԻ ԵՎ ՊԱՏՄԻՉՆԵՐԻ ՏԵՂԵԿՈՒԹՅՈՒՆՆԵՐԸ ՀԱՅԿԱԿԱՆ ԼԵՌՆԱՇԽԱՐՀՈՒՄ ԿԻՄԵՐՆԵՐԻ ՈՒ ՍԿՅՈՒԹՆԵՐԻ ԳՏՆՎԵԼՈՒ ՄԱՍԻՆ

Գարեգին Թումանյան

Պատմական գիտությունների դոկտոր
ՀՀ ԳԱԱ հնագիտության և ազգագրության ինստիտուտ
ՀՀ, Երևան, Չարենցի 15
Էլ. հասցե՝ gstumanyan@gmail.com

Հոդվածը ներկայացվել է 14.11.2021, գրախոսվել է 15.11.2021, ընդունվել է տպագրության 11.12.2023
ORCID: 0000-0002-6696-0093
DOI: 10.53548/0320-8117-2023.3-42

Ներածություն

Հայոց բնաշխարհում կիմերների և սկյութների զորաջոկատների առկայությունը փաստագրվել է Աստվածաշնչում, հունա-հռոմեական ու հայ պատմիչների աշխատություններում, նաև ասորեստանյան և ուրարտական սեպագիր արձանագրություններում: Իհարկե, սեպագիր աղբյուրների տեղեկություններն առավել նախընտրելի են, քանի որ դրանց հեղինակները պատմական իրադարձությունների ժամանակակիցներն են: Սակայն, հնագիտական պեղումների արդյունքների և սեպագիր սկզբնաղբյուրների տվյալների հիման վրա Հայկական լեռնաշխարհում և հարևան տարածաշրջաններում կիմերների ու սկյութների ներկայության վերաբերյալ մեր պատկերացումները կարող են զգալիորեն ընդարձակվել և ամբողջանալ, եթե հարցի առնչությամբ քննության առնվեն նաև Աստվածաշնչի ու պատմիչների հաղորդումները:

Աստվածաշնչի տեղեկությունները

Կիմերների և սկյութների մասին վկայություններ կան Աստվածաշնչում: Ըստ ժողովուրդների աղյուսակի կամ էպոնիմների ցանկի, Ասքանազն ու Թոգարմա-Թորգոմը Նոյի թոռան և Հաբեթի որդու՝ Գոմերի որդիներն են¹: Եզեկիելի մարգարեության համաձայն, Աստված խոստանում է Իսրայելի ժողովրդի դեմ ուղարկել «Գոմերը և նորա բոլոր գոմդերը»², այսինքն՝ կիմերներին³: Հին կտակարանում հանդիպում է սկյութների վերաբերյալ մեկ այլ

¹ Աստվածաշունչ 1922, 9-10 (Ծննդոց, Ժ):

² Աստվածաշունչ 1922, 940 (Եզեկիել, ԼԸ): Հայերեն թարգմանության «գոմդ» եզրը լավագույն ձևով է բնորոշում հեծյալ ջոկատներից կազմված կիմերական (և սկյութական) շարժուն զորամիավորումների կառուցվածքը: Նույն տեղում խոսվում է նաև սկյութական *գոգ* ցեղախմբի և նրա էպոնիմ *Գոգի* մասին:

³ Ղափանցյան 1940, 218, Дьяконов 1956, 246, Пиотровский 1959, 237, Ադունց 1972, 311:

հնագույն հիշատակություն: Երեմիա մարգարեին է վերագրվում Բաբելոնի դեմ ուղղված հետևյալ կոչը. «...հրափրեցէք նորա դեմ Արարատի, Միննիի և Ասքանասի թագավորությունները...»⁴, որտեղ «Ասքանազի թագավորություն» անվան տակ հասկացվում են սկյութները⁵: Աստվածաշնչյան ավանդության համաձայն, այս խոսքերը գրառվել են մ.թ.ա. VI դարի սկզբին: Հետաքրքիր է, որ Երեմիայի մարգարեությունում հիշատակված «Ասքանազի թագավորություն»-ը Խորենացու Հայոց պատմությունում փոխարինված է «Ասքանազեան գունդ» արտահայտությամբ⁶, որն առավել բնորոշ է սկյութական տերունական կառուցվածքին⁷:

Աստվածաշնչում անդրադարձ է արվում նաև Ասորեստանի արքա Սինաքերիբի վախճանի հետ կապված հանգամանքներին, որին սպանելուց հետո Ադրամելեքը և Սարասարը փախչում են Արարատի երկիրը⁸: Ըստ «Հայոց պատմության», Սանասարին մեր երկրի սահմաններում է բնակեցնում մեր քաջ նախնի Սկայորդին⁹: Ն. Ադունցն ուշադրություն է դարձրել Աստվածաշնչի մի «ցուցումի» վրա՝ հունարեն տեքստի Σχῆθαι-ը հայերենում թարգմանված է Χάλδοι¹⁰: Սույն փաստը համադրելով Քսենոփոնի և Ստրաբոնի վկայությունների հետ՝ Ս. Երեմյանը հավանական է համարում, որ *սկյութները* ձուլված լինեն Խաղտիքի բնակիչներին¹¹:

Հունարեն հնագույն աղբյուրների տեղեկությունները

Հունարեն հնագույն աղբյուրներն առասպելախառը տեղեկություններ են հաղորդում կիմերների մասին: Հոմերոսն առաջինն է, որ հիշատակում է նրանց: Ոդիսևսը «մեռյալների թագավորություն» ուղևորվելիս հասնում է օվկիանոսի սահմաններին, որտեղ՝ հավերժական խավարի մեջ, «գտնվում են կիմերացի մարդկանց քաղաքն ու երկիրը»¹²: «Ոդիսականի» հեղինակը, հավանաբար, գիտեր կիմերների ամայացնող արշավանքների մասին՝ Բոսպորից մինչև Հոնիա¹³: Հոմերոսյան պոեմում պատմամշակութային ծանոթ

⁴ Աստվածաշունչ 1922, 883 (Երեմիա, ԾԱ):

⁵ Ղափանցյան 1940, 218, Дьяконов 1951, 248, N 83, Ադունց 1972, 311, Дьяконов 1981, 33-34:

⁶ «Եւ զի արդարև զայնու ժամանակաւ էր ազգիս մերոյ թագաւորութիւն, վկայէ և Երեմիա մարգարէ ի բանս իւր, հրափրելով ընդդէմ Բաբելոնի ի պատերազմ. Հրաման տուր, ասէ, Այրարատեան թագաւորութեանն և Ասքանազեան գնդին». տե՛ս Խորենացի 1913, I, ԻԲ:

⁷ Հետազոտողները երբեմն, հիմնվելով «Ասքանազի թագավորություն» եզրին, վերջինս գործածում են «Սկյութական թագավորություն» ձևով: Փորձ է արվել անգամ այն անվանել «Ադրբեջանասկյութական թագավորություն». հմմտ. Алиев 1960, 230: Հատկանշական է, որ այդ «առաջարկը», արվելու պահից սկսած, մոռացվել և անտեսվել է հենց իր՝ հեղինակի կողմից:

⁸ Աստվածաշունչ 1922, Թագավորաց, IV, ԺԺ, Եսայի, ԼԷ:

⁹ Խորենացի 1913, I, ԻԳ:

¹⁰ Ադունց 1972, 305:

¹¹ Երեմյան 1968ա, 96:

¹² Հոմերոս 1988, XI, 13-19:

¹³ Страбон 1964, I, 1, 10; I, 2, 9.

իրողությունները վերագրվել են ոչ այնքան քաջաճանոթ ժողովրդին¹⁴: Հոմերոսյան ժամանակաշրջանի հույների պատկերացումների համաձայն, կիմերների հայրենիքը գտնվում էր ինչ-որ տեղ՝ հյուսիսում, բնակելի երկրի սահմանների մոտ¹⁵:

Եփեսոսցի բանաստեղծ Կալլինոսի (մ.թ.ա. VII դ.) էլեգիաներից մեկում Լիդիայի պերճ մայրաքաղաք Սարդեսի վրա գրոհող կիմերները բնորոշվում են «կատաղի/վայրենաբարո» մակդիրով¹⁶:

Թե ինչպես են Սև ծովի մոտ ապրող կիմերները, ճնշվելով սկյութներից, լքել իրենց երկիրը, պատմել է Արիստեաս Պրոկոննեսոսցին (մ.թ.ա. VII կամ VI դ.) իր «Արիմասպեականք» պոեմում¹⁷:

Հունա-հռոմեական պատմիչների հաղորդումները

Ըստ պատմահայր Հերոդոտոսի, որը կրկնում է Արիստեասին, կիմերներն Ասիա են հասել՝ սկյութների կողմից արտամղվելով իրենց բնակավայրերից, իսկ սկյութներն այդ տարածաշրջան են ներխուժել՝ հետապնդելով փախչող կիմերներին: Կիմերները, մշտապես շարժվելով ծովափով (Մետոսի-Կողքիսյան ճանապարհով - Գ.Թ.), հայտնվել են Փոքր Ասիայում, իսկ կիմերներին հետապնդող սկյութներն ընթացել են «Կովկասն աջ կողմում ունենալով», ներխուժել մարերի բնակության տարածքներ, այնուհետև շարժվել են դեպի Միջերկրաք: Ասիայում սկյութներից խռամբելով՝ կիմերները հաստատվել են մի թերակղզում՝ ապագա Սինոպ քաղաքի տեղում¹⁸: Ուսումնասիրողներից ոմանք կարծում են, որ Հերոդոտոսը սխալվում է՝ խոսելով սկյութների կողմից կիմերների անմիջական հետապնդման մասին¹⁹: Այս ավանդազրույցի հիմքում, հավանաբար, ընկած է այն պատմական իրողությունը, որ Առաջավոր Ասիայում կիմերական նվաճումները նախորդել են սկյութական արշավանքներին: Հերոդոտոսը բազմիցս անդրադառնում է նաև մասագետներին, որոնք բնակվում են արևելքում, «Արաքս գետից այն կողմ»²⁰ և, ուրիշների պատմելով, «սկյութական ազգ են»²¹: Սկյութիան նկարագրելիս Հերոդոտոսն օգտվել է ինչպես գրավոր աղբյուրներից, այնպես էլ տեղացիների պատմածներից ու անձնական դիտարկումներից²²:

¹⁴ Дьяконов 1956, 229.

¹⁵ Ельницкий 1949, 26.

¹⁶ Худopoulos 2015, 120.

¹⁷ Հերոդոտոս 1988, IV, 12-14: Հմմտ. նաև Иванчик 1989, 42-44, Пьянков 2005, 16:

¹⁸ Հերոդոտոս 1988, I, 15, 103, 104; IV, 1, 11, 12; VII, 20:

¹⁹ Дьяконов 1956, 242, Иванчик 1999, 86.

²⁰ Անկախ այն հանգամանքից, թե ինչպես կոտեղայնացվի Արաքս գետը, այս և մյուս հատվածներից ակնառու է դառնում մասագետների սկյութական ցեղի առնչվածությունն Արաքսին:

²¹ Հերոդոտոս 1988, I, 201:

²² Жебелев 1953, 30.

Հաջորդ պատմիչը, որ հիշատակում է հին Հայաստանում բնակվող «սկյութիններին», Քսենոփոնն է (մ.թ.ա. V-IV դարեր): Քննարկվող հարցի կապակցությամբ Քսենոփոնի վկայությունները ծանրակշիռ են և ուշադրության արժանի, քանի որ որպես նահանջող բանակի զորահրամանատար, ի շարս բազմաթիվ հայկական գավառների, նա անցել է նաև իրար թշնամի երկու ցեղերի բնակեցրած տարածքներով²³, որոնք, հավանաբար, Վանի թագավորության ժամանակաշրջանում Հայկական լեռնաշխարհի ներխուժած կիմերական ու սկյութական ցեղախմբերի հետնորդներն էին: Պատմիչն այդ տարածաշրջանում նշում է Հարպասոս գետը և Գյումնիաս քաղաքը: Փորձ է արվել Քսենոփոնի հիշատակած այս քաղաքը նույնացնել «հին Կոմայրիին, այժմյան... Գյումրիին»²⁴: Եթե այդ համապատասխանեցումը ճիշտ է, ապա հնարավոր է, որ պատմիչի նշած Հարպասոս գետը համընկնի Արփայի հետ, որը չի կարելի բացառել ինչպես հնչյունաբանորեն, այնպես էլ տարածական առումով:

Պոլիբիոսը (մ.թ.ա. III դ. վերջ – II դ.) գրում է սկյութների դեմ Դարեհի արշավանքի, Սկյութապոլիս քաղաքի, *դայերի* սկյութական ցեղի մասին: Բեռլտացիների համաժողովրդական տոնը խախտողներին նա համեմատում է սկյութների ու գալատների հետ²⁵: Պոլիբիոսը, «բարբարոս ժողովուրդներ» ասելով, ակնարկում է նաև սկյութներին:

Պոսիդոնիոսը (մ.թ.ա. II դ. վերջ – I դ. կես) հիշատակում է Գերմանիայից կիմերների ներխուժումն Իտալիա՝ նրանց բնորոշելով որպես «հազարավոր վայրենիներ»²⁶:

Դիոդորոս Սիկիլիացին (մ.թ.ա. I դ.), պատմելով Ասիան ասպատակած կիմերների մասին, նրանց բնորոշում է որպես քաջ և կատաղի/վայրենի մարդիկ, որոնք արդեն իր ժամանակ աշխարհին հայտնի էին *կիմերներ* ցեղանունով²⁷: Նա հիշատակում է նաև Հայկական լեռնաշխարհում բնակվող «սկյութիններին»: Նրա հեղինակած «Պատմական գրադարան»-ում Հարպասոս գետը վկայված է Հարպագոս անվամբ, իսկ Գյումնիաս քաղաքը՝ Գյումնասիա ձևով²⁸: Սկյութական ցեղերի շարքում թվարկվում են սակերը, մասագետները, սավրոմատները: Սկյութները սկզբում փոքր թվով բնակվելիս են եղել Արաքս գետի ափին: Որոշ ժամանակ անց հզորանալով՝ նրանք կարողանում են իրենց տիրապետությունը տարածել մինչև Նեղոս գետը²⁹: Ըստ մեկ այլ տեղեկության, Ասորեստանի արքա Նինոսը մեծաթիվ զորքով ներխուժել է Արմենիա, ավերել է մի շարք քաղաքներ, իսկ այդ երկրի թագավոր Բար-

²³ Քսենոփոն 1970, IV, VIII, 18-20:

²⁴ Մանանդյան 1944, 16-17, 20:

²⁵ Polybius 2010-2011, IV, 43; V, 70, 79; IX, 34.

²⁶ Posidonius 1972, Book 30.

²⁷ Diodorus 1967, Book V (181-182).

²⁸ Դիոդորոս 1985, գիրք 14, 29:

²⁹ Դիոդորոս 1985, գիրք 2, 43: Ենթադրվում է, որ սկյութներն անցել են Հայկական լեռնաշխարհով մ.թ.ա. 630-625 թթ.:

զանեսն առատ նվերներով ընդառաջ է գնացել Նինոսին և հպատակություն հայտնել³⁰: *Բարզանեսը* համարվում է սկյութական անձնանուն³¹:

Հայկական լեռնաշխարհի և հարակից տարածքներ ներխուժած կիմերական ու սկյութական ցեղերի վերաբերյալ տեղեկություններ է հաղորդում նաև հույն աշխարհագիր Ստրաբոնը (մ.թ.ա. I – մ.թ. I դ.): Նա պատմում է դեպի Փոքր Ասիա կիմերների արշավանքների մասին, որոնց ընթացքում նրանք հարձակվել են Պափլագոնիայի և Փոյուգիայի վրա՝ ինչ-որ ժամանակ հասնելով մինչև Լիդիա և Հոնիա³², և, ինչպես հաղորդում են նախորդ հեղինակները, Սարդեսն առաջին անգամ գրավել են կիմերները³³: Ստրաբոնը խոսում է Իտալիայի Ավերնո լճի մոտ բնակվող կիմերների մասին³⁴: Նա հիշատակում է նաև կիմերներին (որոնց հույները կիմեր էին անվանում) ու նրանց կողմից սրբազան համարվող զոհաբերությունների կաթսան³⁵: Ըստ Ստրաբոնի, հին հույն պատմագիրները հյուսիսային ժողովուրդներին կոչում էին ընդհանրական՝ *սկյութ* անունով, իսկ Կասպից ծովից անդին ապրող ցեղերի մի մասին անվանում էին *սակեր*, մյուսներին՝ մասագետներ³⁶: Նա հղում է Թեոփանեսին, որն այցելելով Աղվանք՝ պատմում է, որ *գեղեր*³⁷ ու *լեգեր* կոչվող սկյութական ցեղերն ապրում են ամազոնուհիների և աղվանների միջև: Մեկ այլ տեղում, Կասպից ծովից արևմուտք ընկած տարածքում բնակվող հայերի և աղվանների հետ, Ստրաբոնը կրկին հիշատակում է գեղերին³⁸: Նա գրում է սկյութների, կիմերների և թերերների մասին, *սկյութ* ցեղանվան փոխարեն գործածելով *սակ* իրանական ձևը³⁹: Աշխարհագիրը հաղորդում է, որ «սակերը... Հայաստանում տիրացան լավագույն հողերին, որին թողեցին իրենց անունը՝ Սակասենե...»⁴⁰:

Հովսեփոս Փլավիոսի (մ.թ. I դ. – մ.թ. II դ. սկիզբ) տեղեկությունները նույնպես հետաքրքիր են: Նա հիշատակում է Յափեթ/Հաբեթի որդիներ Գոմարին ու Մագոգեսին, որի հետնորդներին հելլենները *սկյութացիներ* են անվանում, ինչպես նաև Գոմարի որդիներ Աքանաքսեսին և Թյուգրամեսին:

³⁰ Դիոդորոս 1985, գիրք 2, 1:

³¹ Դավայան 2007, 252-253:

³² Страбон 1964, I, 3, 21; III, 2, 12; XI, 2, 5.

³³ Страбон 1964, XIII, 4, 8; XIV, 1, 40.

³⁴ Страбон 1964, V, 4, 5.

³⁵ Страбон 1964, VII, 2, 1; VII, 2, 2.

³⁶ Страбон 1964, XI, 6, 2; XI, 8, 2.

³⁷ Ստրաբոնի հիշատակած ցեղերից էին կազմված, հավանաբար, «գեղաց գեղերը», որոնք պարսից զորքի կազմում Ավարայրում կռվում էին հայոց բանակի դեմ: Ենթադրվում է, որ մ.թ. V դարում գեղերը բնակվում էին Գիլանում. հմմտ. Եղիշե 1946, 189, 301:

³⁸ Страбон 1964, XI, 5, 1; XI, 7, 1, Ստրաբոն 1940, 35:

³⁹ Ադոնց 1972, 304:

⁴⁰ Страбон 1964, XI, 8, 4.

Վերջինին հելլենները փոյուզների նախնին են համարում⁴¹: Հովսեփոսը խոսում է նաև դայերից ու սակերից կազմված բանակի մասին⁴²:

Պլուտարքոսի (մ.թ. I – II դդ.) պատկերացումը կիմերների վերաբերյալ, ըստ երևույթին, քաղված է «Ողիսական»-ից⁴³: Հոմերոսի այն տեսակետը, թե կիմերները ապրում են հավերժական խավարի մեջ, հետագայում համընդունելի է դարձել: Նա անդրադառնում է նաև *կիմերների* դեմ տարած հաղթանակներին⁴⁴: Պատմիչը խոսում է *գելերի* ու *լեգերի* ցեղերի մասին և հիշատակում սկյութների երկիրը⁴⁵: Մեկ այլ տեղում՝ մակեդոնական ջոկատի ջախջախման կապակցությամբ, նկատի ունենալով սկյութներին, նա գործածում է *բարբարոսներ* արտահայտությունը⁴⁶:

Տակիտոսը (մ.թ. I – II դդ.) հաղորդում է, որ Վոնոնը փորձել է Կիլիկիայից փախչել Հայաստան, որպեսզի, աղվանների ու հենիոխների երկրների միջով անցնելով, հասներ իր ազգական սկյութական թագավորի մոտ⁴⁷:

Դիոն Կասսիոսը (մ.թ. II – III դդ.) պատմում է, որ Միհրդատը ծրագրել էր սկյութների երկրի միջով հասնել Իստրոս և այնտեղից ներխուժել Իտալիա⁴⁸: Սկյութները հիշատակվում են նաև «Հռոմեական պատմության» այլ հատվածներում՝ Հայաստանի ու հարակից տարածաշրջանների իրադարձությունների առնչությամբ⁴⁹:

Պատմական ասպարեզից սկյութների հեռանալուց հետո էլ նրանց մասին հիշողությունները միանգամից չեն մարում: Բյուզանդական պատմիչ Պրոկոպիոս Կեսարացին, մ.թ. VI դարում, խոսելով Իլլիրիայի ու Թրակիայի ամայնալու մասին, դրանք համեմատում է «սկյութական անապատի» հետ: Նա հիշատակում է նաև Սկյութոպոլիս (Բեթ ս/շան) քաղաքը⁵⁰:

Հայ պատմիչների հաղորդումները

Հայ պատմական ավանդությունը հարցին յուրօրինակ մոտեցում է ցուցաբերում: Մեր պատմագիրները կիմերներին ու սկյութներին հաճախ դիտում են որպես ազգակիցներ՝ նրանց նույնացնելով հայերի հետ: Կորյունը, խոսելով Հայաստան աշխարհի և *Ասքանազյան* ազգի աստվածապարզ Գրի մասին, ակնհայտորեն նկատի ունի հայոց ազգը⁵¹:

⁴¹ Հովսեփոս 1976, Հրեական հնախոսություն, I, 122-127:

⁴² Հովսեփոս 1976, Հրեական հնախոսություն, XVIII, 100, XX, 91:

⁴³ «...Բայց կիմերներին դեռ ոչ ոք պիղծ չի անվանել, թեև արևը, նրանց կարծիքով, բնավ գոյություն չունի»: տե՛ս Պլուտարքոս 1987, Մնահավատության մասին (10):

⁴⁴ Պլուտարքոս 1987, Կեսար, VI:

⁴⁵ Պլուտարքոս 1987, Պոմպեոս, XXXV, XLI:

⁴⁶ Պլուտարքոս 1987, Ալեքսանդր, L, Ստոյարով 1987, 726:

⁴⁷ Tacitus 1962, II, 68.

⁴⁸ Դիոն 1976, XXXVII, 11, 1:

⁴⁹ Դիոն 1976, LXXV, 3, 1:

⁵⁰ Պրոկոպիոս 1987, 95, 125:

⁵¹ Կորին 1941, 22:

Խորենացին Նոյի որդուն և վերջինիս ժառանգներին թվարկում է հետևյալ հաջորդականությամբ՝ Հաբեթ, Գամեր/Գոմեր, Թիրաս, Թորգոմ⁵², Հայկ⁵³: Գ.Ա. Ղափանցյանի կարծիքով, հայոց Պատմահայրը, գրելով Պայապիս Քաղյայի մասին (I, ԺԴ), նկատի ունի կիմերական ներխուժումը⁵⁴: Պատմիչի հայոց արքայացանկում հիշատակվում են նաև Արբակ ու Բազուկ անձնանունները (I, ԺԹ): Ուշագրավ է, որ Ֆ. Քյոնիգն Արբակին համարում է կիմերների առաջնորդ⁵⁵, իսկ Բազուկ էր կոչվում օվսերի արքան, որի զորքը, ըստ Լեոնտի Մոռվելու, ի թիվս այլ ասպատակողների, ներխուժել էր Հայաստան⁵⁶: Խորենացու աշխատության մեջ առկա է հավանաբար հյուսիսում գտնվող երկրներից մեկի՝ *Քիմյոռոն* անվանումը⁵⁷, որը պարզապես կարող է նշանակել «Կիմերների երկիր»⁵⁸: Պատմահայրը մեկ այլ տեղում (I, ԻԲ) գրում է. «Բայց արդե՞ս առ օտարաց թագաւորութեամբն կացեալ՝ ընդ նոցայն զմերս ազգի ածից զկարգ թագաւորացն, զի մերոյ աշխարհիս բնիկք պսակաւորք արքայնոքիկ, զորոց զանաւանսն ի ներքոյ դրոշմեսցուք»: Թվարկելով հայոց այն թագավորներին, որոնք իրեն առավել սիրելի են իբրև բնիկներ և արյունակիցներ, նա առաջինը հիշատակում է Սկայորդու որդի Պարույրին⁵⁹, այլ խոսքով՝ սկյութների առաջնորդ Պարտատուային⁶⁰: Հիշյալ արքայացանկում Սկայորդուն նախորդող Կայակը⁶¹, ըստ հայտնված մի կարծիքի, կարող է համապատասխանել ասորեստանյան աղբյուրներում հիշատակված Իշպակային կամ ուրարտական սեպագիր արձանագրության Շագայորդուն (Սկայորդուն)⁶²: Ըստ երևույթին, Խորենացին հիշատակում է նաև Պարտատուայի որդուն՝ Մադեսին, տարբեր համատեքստերում: Մի դեպքում՝ որպես Հայկյան Արամի հակառակորդ՝ Նյութար Մադես անունով⁶³: Վերջինիս երկրորդ բաղադրիչը նույնանում է Պարտատուայի որդու անվանը, իսկ առաջին բաղադրիչի սկզբնամասը նշանակում է *գեղեցիկ*⁶⁴: Մեկ այլ տեղում (I, ԻԲ) Պատմահայրը հիշատակում է Պարույրի որդուն՝ Հրաչյային, որն այդպես էր կոչվում պայծառ երես և բոցավառ աչքեր ունենալու համար: Այսինքն՝ պատմիչը, հավանաբար, հաղորդում է Պարույրի որդու ոչ թե անունը, այլ՝

⁵² Հայոց ազգածագման «թորգոմյան» վարկածի վերաբերյալ տե՛ս Քոչյան 1998, 5-10 և հտն:

⁵³ Խորենացի 1913, I, Ե, Թ, ԺԲ:

⁵⁴ Капанцян 1947, 236-237.

⁵⁵ Köniq 1934, 41.

⁵⁶ Мровели 1979, 33-34.

⁵⁷ Խորենացի 1913, I, Լ:

⁵⁸ Иванчик 1996, 157.

⁵⁹ Խորենացի 1913, I, ԻԲ:

⁶⁰ Ղափանցյան 1944, 84-85:

⁶¹ Խորենացի 1913, I, ԻԹ:

⁶² Կարապյոզյան 1984, 80:

⁶³ Խորենացի 1913, I, ԺԳ:

⁶⁴ Եղիշե 1946, 209, ծան. 140:

մականունը, որի իմաստը, մեկ բառով, նույնպես կլինի *գեղեցիկ*⁶⁵: Դա էլ, իր հերթին, համընկնում է *Նյութարի* ստուգաբանությանը: Վերջինիս համար ժամանակին մեկ այլ ստուգաբանություն է առաջարկել Ղևոնդ Ալիշանը: Նրա կարծիքով, «Նիւքեր պարսկերէն նշանակէ պաշտօնեայ, բայց և այս անոամբ թագաւոր մի յիշեն Պարսիկք»⁶⁶: *Նյութար* անվան *կառավարիչ* իմաստը համահունչ է այն ենթադրությանը, որ Մադիոսը դարձել է Նիխորական գավառի կառավարիչ, որի հիմքում ընկած է Նիխոր/Նիւքար անունը⁶⁷: Պատմական Մադես-Մադիոսը ջախջախել է կիմերներին և մոտավորապես մ.թ.ա. 625 թ. սպանվել մարերի ձեռքով⁶⁸: Այսպիսով, հիշյալ արքայացանկում Անուշավանից հետո թվարկված անձինք առնչվում են Հայքի մ.թ.ա. VII-VI դդ. առաջին կեսի պատմական իրադարձություններին և, հավանաբար, մեծ մասամբ ներկայացնում են կիմերական ու սկյութական առաջնորդներին⁶⁹: Վերջապես, անդրադառնալով Արտաշես արքայի թաղման՝ Խորենացու նկարագրությանը⁷⁰, Հ. Մարտիրոսյանը կարծիք է հայտնում, որ դա հիշեցնում է այսրկովկասյան թաղման ծեսը և մերձկուբանյան հարուստ դամբանաբլուրները⁷¹:

Հարկ ենք համարում կրկին անդրադառնալ Սինաքերիբի սպանությանն առնչվող հետագա դեպքերին⁷², կապված Խորենացու մեկնաբանության հետ: Ըստ «Հայոց պատմության», Սանասարին մեր երկրի հարավարևմտյան կողմում, Ասորեստանի սահմանների մոտ է բնակեցնում «մեր քաջ նախնի» Սկայորդին⁷³: Այս պատմական իրադարձությունները տեղի են ունենում մ.թ.ա. 681 թ. վերջին – 680 թ. սկզբին⁷⁴: Ռուսա II-ին վերագրվող ուրարտական արձանագրություններից մեկը վկայում է Շագայորդու/Սկայորդու առաջնորդությամբ սկյութների զորաշարժը դեպի Մանա⁷⁵, իսկ Ասարհադունի արձանագրությունում խոսվում է Մանայում սկյութական զորքի առկայության մասին⁷⁶: Սկյութների հարձակման թիրախների թվում հիշատակվում է նաև Խուբուշկիան⁷⁷: Ըստ Խորենացու՝ Սկայորդին ոչ միայն հիշյալ դեպքերի

⁶⁵ Հարցի առնչությամբ տեղին է բերել Գ. Ղափանցյանի կարծիքն ամբողջությամբ. «Հրաչյան ըստ Խորենացու, «պայծառերես և բոցակնագոյն» և այդ պատճառով էլ կոչվեց «Հրաչյա»: Արդյոք այս ևս ապացույց չէ՞ սկյութական-սակական ծագման, քանի որ այդ ժողովուրդները ավելի հյուսիսային էին և շեկ պետք է լինեին». հմմտ. Ղափանցյան 1940, 217: Ուշագրավ է, որ շեշտվում է Պարույրի որդու սկյութական ծագումը:

⁶⁶ Ալիշան 1901, 16, ծան. 5:

⁶⁷ Marquart 1901, 24, Մարկվարտ 1961, 231, Դալայան 2013, 284:

⁶⁸ Երեմյան 1968թ, 101:

⁶⁹ Անշուշտ, չի բացառվում սույն ցուցակում միևնույն պատմական անձի՝ տարբեր անուններով և տարբեր տեղերում հանդես գալու հնարավորությունը:

⁷⁰ Խորենացի 1913, II, Կ, ԿԱ:

⁷¹ Мартиросян 1954, 110-111.

⁷² Luckenbill 1927, 200-201 (§ 502), Дьяконов 1951, 215 (N 63).

⁷³ Խորենացի 1913, I, ԻԳ:

⁷⁴ Дьяконов 1951, 215.

⁷⁵ Дьяконов 1963, 38-39, Арутюнян 2001, 330-331 (N 412).

⁷⁶ Иванчик 1996, 92, 216-218 (N 22).

⁷⁷ Иванчик 1996, 92, 218-221 (N 22).

ժամանակակիցն է եղել, այլև արդեն որոշ իշխանություն է ունեցել Ուրարտուի սահմանամերձ տարածքների վրա: Հետազոտողները համարել են, որ սկյութներն Առաջավոր Ասիայում ամենավաղը հիշատակված են Ասարհադունի արձանագրություններում, որոնք թվագրվում են մ.թ.ա. VII դ. 70-ական թթ.⁷⁸ կամ 70-ական թթ. կեսով, այսինքն, հիշյալ տարածաշրջանում կիմերների և սկյութների հայտնվելու ժամանակագրական տարբերությունը մոտավորապես 40 տարի է⁷⁹: Պատմահոր կատարած համաժամանակացումն ու տեղայնացումը կարծես թե ավելի են համապատասխանում ուրարտական և ասորական արձանագրությունների տվյալներին: Պարզվում է, որ այդ քոչվոր ցեղախմբերից մեկը մյուսից մոտ 30 տարի հետո է արշավել Հայկական լեռնաշխարհ և այստեղ է հայտնվել մ.թ.ա. VII դ. 80-ական թթ. երկրորդ կեսին:

Բացի այդ, Խորենացու «Պատմություն»-ում լրացուցիչ տեղեկություն է հաղորդվում արքայասպանների փախստավայրի մասին: Ադրամելեքի ու Սարասարի գտնվելու տարածաշրջանի վերաբերյալ այս վերջին տեղեկությունն առավել ընդհանուր ձևով առկա է Աստվածաշնչում⁸⁰: Ուշագրավ է նաև, որ Խորենացու աշխատության առաջին գլխում Սարասար անվան փոխարեն առկա է *Սանասար* ձևը, սակայն մեկ այլ տեղում հիշատակվում է հարավարևմտյան տարածաշրջանի մեծ բոլեշխ և կուսակալ Շարաշանը, որը Սանասարի սերնդից էր⁸¹: Սա հուշում է, որ Սանասարը սկզբնապես կարող էր ունեցած լինել *Սարասար* (ինչպես Աստվածաշնչում) կամ *Շարասար* «հայեցի» ձևը, որը շատ մոտ է ասորական *Շարուծուր* անձնանվանը: Հետազոտողները հակված են Սարասարին նույնացնելու ասորական պատմական դեմքերից մեկին՝ Նաբուշարուծուրին⁸²: Այսինքն, «Հայոց պատմության» մեջ տեղ գտած Սանասար ու Շարաշան անձնանունները, հնարավոր է, արձագանքներն են պատմական կարևոր դեմքերից մեկի անվան:

Ազաթանգեղոսն իր «Պատմության» մեջ անդրադառնում է կիմերական և սկյութական ցեղախմբերի կամ նրանց ժառանգորդների հետ կապված մի շարք տեղանունների՝ «դրոնս Ավանաց, կողմանս Գամրաց, Մասքթաց կողմս, սահմանս Մասքթաց»⁸³:

Եղիշեի վկայությամբ, «գեղաց գնդերը» Ավարայրում կռվում էին հայերի դեմ: Պատմիչը հիշատակում է նաև «Ավանաց դռները» և «մասքութների զորքը»՝ Վարդանանց պատերազմին հաջորդած դեպքերի կապակցությամբ⁸⁴:

⁷⁸ Мурзин 1990, 27.

⁷⁹ Алексеев 1992, 14-15.

⁸⁰ Աստուածաշունչ 1922, 458, Թագավորաց, IV, ԺԺ, 36-37, Եսայի, ԼԷ, 37-38:

⁸¹ Խորենացի 1913, II, Ը:

⁸² Дьяконов 1951, 214-215 (N 62), Երեմյան 1971ա, 426:

⁸³ Ազաթանգեղոս 1909, Բ, ՂԴ, ՃԻ, ՃԻ2:

⁸⁴ Եղիշե 1946, 189, 254:

Փավստոս Բուզանդը մասքութներին սահմանակից է համարում Վրաց ու Աղվանից աշխարհներին: Նա հիշատակում է մասքութների Սանեսան թագավորի «բանակի ճամբարը» և Սանեսանին ներկայացնում է իբրև «Հոնաց բազմաթիվ զորքերի իշխան»: Մասքութների արքային ենթակա են համարվում մի շարք վաչկատուն ցեղեր, որոնց թվում՝ նաև ալանները: Փավստոսը նկարագրում է, թե ինչպես հեծյալ զնդերի անթիվ բազմությունն անցնում է Կուր գետն ու սփռվում Հայոց աշխարհում: Արտավազդ Մամիկոնյանի որդին՝ Մեծ Հայքի զորավար Վաչեն, նախ ջարդում է մասքութներին Յլու գլուխ կոչված լեռան վրա, ապա հարձակվում է Վաղարշապատ քաղաքի վրա, որտեղ գտնվում էր Սանեսան թագավորը՝ «բուն գնդի» հետ: Թշնամիները դուրս են մղվում Վաղարշապատից, փախչում են դեպի Օշական և բաց դաշտում սրի քաշվում: Ճակատամարտում սպանվում է մասքութների արքան, որն ազգակից էր Մեծ Հայքի Խոսրով թագավորին: Երբ Սանեսանի գլուխը բերում են Հայոց թագավորին, վերջինս լաց է լինում ու ասում. «Իմ եղբայրն էր, Արշակունի ցեղից»⁸⁵:

Պարթևական ժամանակաշրջանի հսկաների (իմա՝ սկյութների - Գ.Թ.) վերաբերյալ կարևոր վկայություն կա Սեբեոսի «Պատմության» մեջ: Պատմիչը Բագարատ Փառազյանի մասին գրում է. «Զսա արար Արշակ արքայ ասպետ Հայաստան երկրին, որ էր իշխան և հրամանատար, ամենայն թագաւորութեանն հրամանաց գլուխ, և հայր արքայի և եղբայր. որում ետ իշխանութիւն տէրութեանն այնորիկ: Նա կոտորեաց զհսկայսն, որ զաւրաժողով եղեն ի վերայ նորա ի Միջագետս Ասորոց»⁸⁶:

Ըստ Մովսես Կաղանկատվացու, Ասքանազն ու Թորգոմը (իմա՝ սկյութների և հայերի նախահայրերը - Գ.Թ.) եղբայրներ են⁸⁷: Գրիգոր քահանայապետի մասին պատմիչը գրում է, որ Աստված նրան «հանձնեց Թորգոմյան երկրին, Ասքանագի սերնդին»⁸⁸:

Սկյութայի, Սարմատիայի, Մասքութների ու Սակե երկրամասերի վերաբերյալ տեղեկություններ կան Անանիա Շիրակացու «Աշխարհացոյց»-ում: Այդ աշխատության մեջ հիշատակվում են նաև մասքութ ժողովուրդը, մասագետացիները, ալանները և այլք⁸⁹:

Ուշ հիշատակություններ

Հայ պատմագրության մեջ կան նաև ուշ հիշատակություններ սարմատ-

⁸⁵ Փավստոս 1832, III, Ե-Է:

⁸⁶ Սեբեոս 1979, 54:

⁸⁷ «Հաբեթի որդիներն են՝ Գամբըր, որի անունից առաջացել են գամիրները..., Թիրասը, իսկ սրանից՝ թրակացիները... Իսկ Թիրասի որդիներն են՝ Ասքանազը, որից և առաջացել են սարմատները. Երիփատը, որից՝ սալրոմատները, Թորգոմը, իսկ սրանից էլ՝ հայերը». տե՛ս Կաղանկատվացի, I, Բ:

⁸⁸ Կաղանկատվացի 1969, I, ԺԴ:

⁸⁹ Շիրակացի 1979, 258-312:

ների, Գամիրքի⁹⁰, Սկյութայի⁹¹, «Գամրաց տան», «Մագքըթաց աշխարհի»⁹², Սկյութա լեռան⁹³ մասին: Դրասխանակերտցին նույնպես կարծում է, որ Ասքանազը և Թորգոմը եղբայրներ են՝ Թիրասի որդիները⁹⁴: Նա ևս հիշատակում է սարմատներին ու սավրոմատներին. «Իսկ որդիք Թիրասայ Ասքանազ, յորմէ Սարմատք և Րիփատ, յորմէ Սօրամատք»: Ըստ որում, պատմիչի կարծիքով, Ասքանազը Թիրասի ավագ որդին է. «զի նախ Ասքանազ իսկ էր յիւր անուն սահմանեալ զմերազնեայսս ըստ երիցութեանն սակի...»⁹⁵:

Թովմա Արծրունին, Խորենացուն հետևելով, պատմում է Տիգրան Հայկազնի մասին, որը Մարաստանի Ածդահակ թագավորի դեմ պատերազմելու համար զորք է հավաքում կապադովկիացի զորավոր և քաջամարտիկ տղամարդկանցից⁹⁶: Պատմիչը Սենեքերիմյանների շարքում հիշատակում է *Գոգյան* անունով իշխանին⁹⁷:

Մեծ Հայքի բոլորությունները թվարկելիս Ուխտանեսն եպիսկոպոսը հիշատակում է «և զչորրորդն ի Մաքթթաց կողմանէն»⁹⁸: Սամուել Անեցին, հետևելով Խորենացուն, Թորգոմին համարում է Թիրասի որդին ու Գամերի թոռը, իսկ Հայկին՝ Թորգոմի որդին⁹⁹: Վարդան Արևելցին, խոսելով Հայաստանից արևելք ընկած երկրների մասին, հիշատակում է «Սկիութա, որ Թուրք անուանին»: Այս հատվածը երկու ձեռագրում հանդիպում է նաև «Սկիութ որ տուք անուանեն» ձևով¹⁰⁰: Չի բացառվում, որ իրականությանն ավելի է համապատասխանում վերջին արտահայտությունը, որի մեջ *տուքի* փոխարեն պետք է կարդալ *տուհք*¹⁰¹:

Վրաց պատմիչ Լեոնտի Մոռվելիին (XI դ.) վերագրվող «Քարթլիս ցխովրեբա» երկում հիշատակվում է «խազարների» արշավանքը: Ուշագրավն այն է, որ, վրաց ժամանակագրության հեղինակի ընկալմամբ, «խազարների» ներխուժման պատմությունը նախորդում է Ալեքսանդր Մակեդոնացու արշավանքին¹⁰²: Ուսումնասիրողները գտնում են, որ հիշյալ հատվածում նկարագրվում են մինչևիլենիստական դարաշրջանի իրադարձությունները, և տրվում է Քարթլիի նախապատմությունը: Այսինքն, «խազարների» ներխուժ-

⁹⁰ Դրասխանակերտցի 1912, 11-12, Գանձակեցի 1982, Ա:

⁹¹ Ուտիայեցի 1973, Մասն երկրորդ:

⁹² Վարդան Արևելցի 1982, 17, 23, 37:

⁹³ Օրբելյան 1986, 154:

⁹⁴ Հիշատակելով հաբեթի որդիներին, Դրասխանակերտցին գրում է. «Իսկ վեցերորդ զԹիրաս, յորմէ մերն իսկ Ասքանազ և Թորգոմ...»: տե՛ս Դրասխանակերտցի 1912, 11:

⁹⁵ Դրասխանակերտցի, 11-12:

⁹⁶ Թովմա Արծրունի 1985, Դպրություն առաջին, Ե:

⁹⁷ Թովմա Արծրունի 1985, Դպրություն առաջին, Զ:

⁹⁸ Ուխտանեսն 1871, I, ՀԳ:

⁹⁹ Սամուել Անեցի 1893, 10:

¹⁰⁰ Վարդան Արևելցի 1985, 69-70:

¹⁰¹ Թումանյան 2012, 199:

¹⁰² ქართლძა ცხოვრება 1955, 11-16, Мровели 1979, 25-29.

ման պատմության հիմքում, հավանաբար, ընկած են վրաց պատմական ավանդության մեջ պահպանված տեղեկությունները Կովկասի տարածաշրջանով դեպի Առաջավոր Ասիա սկյութական արշավանքների վերաբերյալ¹⁰³: «Քարթլիս ցխովրեբա»-ում ուղղակի հիշատակված է նաև Սկյութիան¹⁰⁴: Թվում է՝ «հյուսիսային» ցեղերի վերաբերյալ անուղղակի վկայություն կա նաև մեծն Երվանդին առնչվող հատվածում: Սոմխիթի/Հայքի այս թագավորը, գրավելով Ծոնդան, այնտեղ բնակեցնում է «գազանաբարո մարդկանց» և քաղաքը կոչում նոր անունով՝ Քաջատուն¹⁰⁵:

Հաղորդումներ զենքի, սովորույթների ու կենցաղի մասին

Աստվածաշունչը և պատմիչները հաղորդում են սկյութական զորաջուկատների մեծ քանակի, սովորույթների, հագուստի, զենքի, կենցաղային իրերի, թաղման ծեսի վերաբերյալ: Աստվածաշունչում ասվում է. «Եւ կգաս քո տեղերից՝ հիւսիսի ծայրերիցը՝ դու ինքդ և շատ ժողովուրդներ քեզ հետ, ամենքը ձիեր հեծած, մեծ բազմութիւնով և շատ զօրքով», կամ՝ «Ես պիտի զարկեմ քո աղեղը ձախ ձեռքիցդ և նետդ վայր պիտի գցեմ աջ ձեռքիցդ»¹⁰⁶: Մեկ այլ տեղում՝ աղեղնավորների կապարճը, հավանաբար, մեծության առումով, համեմատվում է բաց գերեզմանի հետ¹⁰⁷:

Ըստ Հերոդոտոսի, մարերն իրենց նետողական արվեստը սովորել են սկյութական մի ցեղից: Մասագետների զգեստը նման է սկյութականին: Նրանք տիրապետում են և՛ հեծյալ, և՛ հետիոտն կովի ձևերին, աղեղնավորներ են, տեգավորներ ու տապարակիրներ և գործածում են պղնձե (իմա՝ բրոնզե - Գ.Թ.) զենքեր: Սկյութների զենքերից են նիզակն ու աղեղը, նրանց գոտիներից գավաթ է կախված: Նրանց նախահայր Սկյութեսին՝ Հերակլեսի որդուն, բաժին են հասել իր հոր նետ ու աղեղը, գոտին և գավաթը: Բոլոր սկյութները հեծյալ աղեղնավորներ են, նրանք քաղաքներ չեն կառուցում և ապրում են անասնապահությամբ: Արեսին զոհաբերություն մատուցելու նպատակով՝ սրբազան դեզի վրա յուրաքանչյուր ցեղ ցցում է մի հին երկաթե ակինակ, որը և այդ աստծո կոռքն է: Այս ակինակին զոհաբերում են ընտանի կենդանիներ, ձիեր, ինչպես նաև հարյուր գերիներից մեկին: Մարդուն մորթում են, իսկ կենդանիներին զոհաբերում են անարյուն եղանակով: Թշնա-

¹⁰³ Мровели 1979, 4, 50-54, Ковалевская 1984, 70.

¹⁰⁴ ქართლს ცხოვრება 1955, 43, Мровели 1979, 33.

¹⁰⁵ Մելիքսեթ-Բեկ 1934, 15: «Զարիուրելի ու գազանակերպ» են բնորոշվել կիմերները. հմմտ. По-лиен 2002, VII, 2.1, որոնց kimmer - ինքնանվանումը պահպանվել է վրացերենում gmiri ձևով և նշա-նակում է «հերոս, հսկա». հմմտ. Ջահուկյան 1987, 495: Միևնույն ժամանակ, բանահյուսության մեջ կիմերների հակառակորդ սկյութները ներկայացվել են որպես «քաջ/խիզախ շներ». հմմտ. Грантов-ский 1980, 131-132: Ըստ երևույթին, «կտրիճ գայլ/շներ» էին կոչվում նվիրագործման փուլերով անց-նող երիտասարդ սկյութ ռազմիկները. հմմտ. Иванчик 1988, 38-44:

¹⁰⁶ Աստվածաշունչ 1922, Եզեկիել, ԼԸ-ԼԹ:

¹⁰⁷ Աստվածաշունչ 1922, Երեմիա, Ե:

միների կառավարները գործածում են իբրև գավաթ: Սկյութները դաշինք կնքելիս գավի մեջ լցված գինոն խառնում են մասնակիցների արյունը, այս խառնուրդ հեղուկի մեջ թաթախում են ակինակ, նետասլաքներ, տապար և նիզակ, որից հետո խմում են գավաթի պարունակությունը: Թագավորին թաղում են քառակուսի մեծ փոսում, դիակը դնում են հարդե տապաստի վրա, դիակի երկու կողմից հողի մեջ երկու նիզակ են խրում, վրան քաշում են տախտակ ու ծածկում եղեգնյա խսիրով: Թաղումն ուղեկցվում է մարդկանց, ձիերի և այլ կարգի զոհաբերություններով, թանկարժեք գույքով: Նրանք ձգտում են հնարավոր չափով բարձրացնել դամբանաթումբը: «Իսկ սակերը, որոնք սկյութներ են, գլուխներին կրում են սրածայր բարձր գդակ, հագնում անդրավարտիք ու զինված են իրենց տեղական աղեղներով, դաշույններով, ինչպես նաև՝ սագարիս (կոշված) սակրերով»¹⁰⁸:

Ստրաբոնի հաղորդումները լրացնում են Հերոդոտոսին: Մասագետները պաշտում են արևի աստծուն ու նրան ձիեր են զոհաբերում: Նրանք հիանալի հեծյալ և հետիոտն ռազմիկներ են, կրում են զրահ ու (ոսկե) գոտի և զինված են նետ-աղեղներով, սրերով, բրոնզե կացիներով: Մասագետների և սկյութների ապրելակերպն ու թաղման ծեսերը նման են իրար¹⁰⁹:

Հովսեփոս Փլավիոսը գրում է. «Նույնիսկ սկյութացիները, որոնք զվարճանում են մարդկանց սպանելով և քիչ բանով են տարբերվում վայրի գազաններից, պարտք են համարում չիրաժարվել իրենց բարքերից...»¹¹⁰:

Պլուտարքոսի կարծիքով, մաքուր գինի խմելը սկյութական սովորություն է¹¹¹:

Ուշագրավ տեղեկություն է պարունակում Խորենացու հաղորդումը Երվանդ արքայի մահվան վերաբերյալ: Հիշելով, որ Երվանդը Արշակունյաց ցեղի խառնուրդ էր, Արտաշեսը հրամայում է նրան թաղել և մահարձան դնել¹¹²: Եթե հաշվի առնենք, որ պարթև Արշակունիները ծագում էին սկյութական *պառն* կամ *ապառն* ցեղից¹¹³, ապա կարելի է ենթադրել, որ նրանք մեծատոհմիկի գերեզմանին մահարձան կանգնեցնելու սովորություն ունեին:

Եզրակացություններ

Այսպիսով, Աստվածաշնչի ու պատմիչների հաղորդումները լրացնում են Հայկական լեռնաշխարհում և հարևան տարածաշրջաններում կիմերների ու սկյութների ներկայության վերաբերյալ մեր պատկերացումները, որոնք ձևավորվել են հնագիտական պեղումների արդյունքների և սեպագիր սկզբնաղբյուրների տվյալների հիման վրա: Դրանք ընդարձակում են մեր իմացու-

¹⁰⁸ Հերոդոտոս 1986, I, 73, 215; IV, 3, 10, 46, 60-62, 65-67, 70-71; VII, 64:

¹⁰⁹ Страбон 1964, XI, 8, 6-7.

¹¹⁰ Հովսեփոս 1976, Ընդդեմ Ապիոնի, II, 269:

¹¹¹ Պլուտարքոս 1987, Յոթ իմաստունների խնջույքը, 13, Ստոյլարով 1987, 762:

¹¹² Խորենացի 1913, II, Խ2:

¹¹³ Երեմյան 1971թ, 713, ծան. 21:

թյունների շրջանակը Հայկական լեռնաշխարհ ներթափանցած այդ քոչվոր ցեղերի բարքերի, սովորությունների ու կենցաղի մասին: Պատմական ավանդությունը շարունակում է պահպանել կիմերների և սկյութների վերաբերյալ հիշողությունը, որի արձագանքները լսելի են պատմական ասպարեզից նրանց հեռանալուց շատ դարեր հետո:

Գրականություն

- Ագաթանգեղոս 1909, Պատմութիւն հայոց, աշխ. Գ. Տեր-Մկրտչեան և Ստ. Կանայեանց, Տփղիս, «Արագածոտիկ Մ. Մարտիրոսեանցի», 474 էջ:
- Ադոնց Ն. 1972, Հայերի ծագումը (անավարտ), Հայաստանի պատմություն (խմբ.՝ Գ. Սարգսյան), Երևան, «Հայաստան», էջ 287-346:
- Ալիշան Ղ. 1901, Հայապատում, Բ, Պատմութիւնք հայոց, Վենետիկ, «Ս. Ղազար տպ.», 560 էջ:
- Անանիա Շիրակացի 1979, Մատենագրություն, թարգմ., առաջաբանը և ծանոթագր. Ա. Աբրահամյանի և Գ. Պետրոսյանի, Երևան, «Սովետական գրող», 400 էջ:
- Աստուածաշունչ 1922, Մատեան Հին և Նոր Կտակարանների, Կոստանդնուպոլիս, «Ա. Յակոբ Պոյաճեան տպ.», 1347 էջ:
- Դալալյան Տ. 2007, Օտար պատմագիրներից հիշատակված Հայաստանի ամենավաղ արքան, Պատմա-բանասիրական հանդես, N 1, էջ 249-261:
- Դալալյան Տ. 2013, Մարաստանը և Հայաստանը, Հայաստանի հարակից երկրների պատմություն, հ. I (խմբ. Ա. Քոսյան), Երևան, «Զանգակ», էջ 283-288:
- Դիողորոս Սիկիլիացի 1985, Պատմական գրադարան (հատվածներ), թարգմ. բնագրից, առաջաբանը և ծանոթագրությունները՝ Ս.Մ. Կրկյաշարյանի, Երևան, ՀՍՍՀ ԳԱ հրատ., 204 էջ:
- Դիոն Կասիոս 1976, Հռոմեական պատմություն (հատվածներ), թարգմ. բնագրից, առաջաբանը և ծանոթագրությունները՝ Ս.Մ. Կրկյաշարյանի, Օտար աղբյուրները Հայաստանի և հայերի մասին 9. Հին հունական աղբյուրներ Ա (խմբ. Գ.Խ. Սարգսյան), Երևան, ՀՍՍՀ ԳԱ հրատ., էջ 113-268:
- Եղիշե 1946, Վարդանանց պատմությունը, թարգմանությունը, ներածական ուսումնասիրությունը և ծանոթագրությունները՝ Ե. Տեր-Սինասյանի, Երևան, «Հայպետհրատ», 322 էջ:
- Երեմյան Ս.Ս. 1968ա, Կիմերական ու սկյութական ցեղերի արշավանքները և Ուրարտուի ու Ասորեստանի պայքարը քոչվորների դեմ, Պատմա-բանասիրական հանդես, N 2, էջ 89-116:
- Երեմյան Ս.Ս. 1968բ, Հայկական առաջին պետական կազմավորումները (VII-VI դդ. մ.թ.ա.), Պատմա-բանասիրական հանդես, N 3, էջ 91-120:
- Երեմյան Ս.Ս. 1971ա, Հայ ժողովրդի կազմավորման ավարտը և հայկական առաջին պետական կազմավորումները, Հայ ժողովրդի պատմություն, հ. I (խմբ. Ս.Ս. Երեմյան և այլք), Երևան, ՀՍՍՀ ԳԱ հրատ., էջ 423-443:
- Երեմյան Ս.Ս. 1971բ, Մեծ Հայքի պայքարը անկախության համար Արտաշեսյան դինաստիայի անկումից հետո, Հայ ժողովրդի պատմություն, հ. I (խմբ. Ս.Ս. Երեմյան և այլք), Երևան, ՀՍՍՀ ԳԱ հրատ., էջ 703-733:
- Թովմա Արծրունի և Անանուն 1985, Պատմություն Արծրունյաց տան, կազմ., աշխարհաբար թարգմ. և ծանոթագր.՝ Վ. Վարդանյանի, Երևան, ԵՊՀ հրատ., 560 էջ:
- Թումանյան Գ. 2012, «Վարդգես մանկան» վիպական պատառիկի նոր մեկնաբանություն, Պատմաբանասիրական հանդես, N 2, էջ 198-209:

- Կարագյոզյան Հ. 1984, Ուրարտական գաղափարագիր անձնանուններ, Լրաբեր հասարակական գիտությունների, N 1, էջ 72-82:
- Կիրակոս Գանձակեցի 1982, Հայոց պատմություն, թարգմ., առաջաբանը և ծանոթագր. Վ. Առաքելյանի, Երևան, «Սովետական գրող», 352 էջ:
- Կորին 1941, Վարք Մաշտոցի, թարգմ. Մ. Աբեղյանի, Երևան, «Հայպետհրատ», 126 էջ:
- Հերոդոտոս 1986, Պատմություն ինը գրքից (թարգմ. Ս. Կրկյաշարյանի), Երևան, ՀՍՍՀ ԳԱ հրատ., 651 էջ:
- Հոմերոս 1988, Ոդիսական (հին հուն. թարգմ. Հ. Համբարձումյանը), Երևան, ԵՊՀ հրատ., 416 էջ:
- Հովսեփոս Փլավիոս 1976, թարգմ. քնագրից, առաջաբանը և ծանոթագրությունները՝ Ս.Մ. Կրկյաշարյանի, Օտար աղբյուրները Հայաստանի և հայերի մասին 9. Հին հունական աղբյուրներ Ա (խմբ. Գ.Խ. Սարգսյան), Երևան, ՀՍՍՀ ԳԱ հրատ., էջ 5-111:
- Ղափանցյան Գ. 1940, Ուրարտուի պատմությունը, Երևան, ԵՊՀ հրատ., 238 էջ:
- Ղափանցյան Գ. 1944, Արա Գեղեցկի պաշտամունքը, Երևան, ՀՍՍՀ ԳԱ հրատ., 172 էջ:
- Մանանդյան Հ. 1944, Հին Հայաստանի և Անդրկովկասի մի քանի պորթլեմների մասին, Երևան, «Հայպետհրատ», 72 էջ:
- Մատթեոս Ուռհայեցի 1973, Ժամանակագրություն, Երևան, «Հայաստան», 376 էջ:
- Մարկվարտ Ի. 1961, Պարսկախալը նահանգը, Պատմա-բանասիրական հանդես, N 2, էջ 212-244:
- Մելիքսեթ-Բեկ Լ. 1934, Վրաց աղբյուրները Հայաստանի և հայերի մասին, Երևան, «Մելքոնյան ֆոնդի հրատ.», 268 էջ:
- Մովսես Կաղանկատվացի 1969, Պատմություն Աղվանից աշխարհի, թարգմ., առաջաբանը և ծանոթագր. Վ. Առաքելյանի, Երևան, «Հայաստան», 321 էջ:
- Մովսես Խորենացի 1913, Պատմութիւն հայոց, աշխատութեամբ Մ. Աբեղեան եւ Ս. Յարութիւնեան, Տիգրիս, «Արագատիպ Մ. Մարտիրոսեանցի», 396 էջ:
- Յովհաննէս Դրասխանակերտցի 1912, Պատմութիւն հայոց, Թիֆլիս, «Ն. Աղանեսանցի տպ.», 427 էջ:
- Պլուտարքոս 1987, Երկեր, ռուս. թարգմ. Հ. Հարյանը, Երևան, «Հայաստան», 796 էջ:
- Պրոկոպիոս Կեսարացի 1987, Գաղտնի պատմություն (թարգմ. հին հուն. քնագրից Հ. Բարթիկյանի), Երևան, ԵՊՀ հրատ., 164 էջ:
- Ջահուկյան Գ.Բ. 1987, Հայոց լեզվի պատմություն: Նախագրային ժամանակաշրջան, Երևան, ՀՍՍՀ ԳԱ հրատ., 748 էջ:
- Սամուել Անեցի 1893, Հաւաքմունք ի գրոց պատմագրաց, յառաջաբանով, համեմատութեամբ, յաւելումներով եւ ծանօթութիւններով Արշակ Տէր-Միքելեանի, Վաղարշապատ, «Ս. Էջմիածնի տպարան», 331 էջ:
- Սեբեոս 1979, Պատմութիւն, աշխատասիրությամբ Գ. Աբգարյանի, Երևան, ՀՍՍՀ ԳԱ հրատ., 446 էջ:
- Ստեփանոս Օրբելյան 1986, Սյունիքի պատմություն, թարգմ., ներած. և ծանոթագր. Ա.Ա. Աբրահամյանի, Երևան, «Սովետական գրող», 616 էջ:
- Ստոյկարով Ա. 1987, Մեկնաբանություններ, Պլուտարքոս, Երկեր, ռուսերենից թարգմանեց Հ. Հարյանը, կազմ. Ս. Ավերինցևա, նախաբանը Ա. Լոսկի, Երևան, «Հայաստան», 1987:
- Ստրաբոն 1940, Քաղեց և թարգմանեց Հ. Աճառյան, Յերևան, ԵՊՀ հրատ., 124 էջ:
- Վարդան Արեւեցի 1972, Մեկնութիւն Քերականի, աշխատասիրությամբ Լ. Խաչերյանի, Երևան, ՀՍՍՀ ԳԱ հրատ., 180 էջ:
- Ուխտանէս եպիսկոպոս 1871, Հատուած առաջին, Պատմութիւն հայոց, Վաղարշապատ, «Մայր Աթոռ Սուրբ Էջմիածնի հրատ.», 116 էջ:
- Փաւստոս Բուզանդ 1832, Պատմութիւն հայոց ի չորս դարութիւնս, Վենետիկ, «Ս. Ղազար» հրատ., 278 էջ:
- Քսենոփոն 1970, Անաբասիս (թարգմ. Ս. Կրկյաշարյանի), Երևան, ՀՍՍՀ ԳԱ հրատ., 284 էջ:

- Քոսյան Ա. 1998, Տոն Թորգոմայ (առասպել և իրականություն), Երևան, ՀՀ ԳԱԱ արևելագիտության ինստիտուտի հրատ., 79 էջ:
- Алексеев А.Ю. 1992, Скифская хроника (Скифы в VII-IV вв. до н.э.: историко-археологический очерк), Санкт-Петербург, «Петербургкомстат», 206 с.
- Алиев И. 1960, История Мидии, т. I, Баку, изд. АН АзССР, 491 с.
- Арутюнян Н.В. 2001, Корпус урартских клинообразных надписей, Ереван, «Гитутюн», 542 с.
- Грантовский Э.А. 1980, Проблемы изучения общественного строя скифов, Вестник древней истории, N 4, с. 128-155.
- Дьяконов И.М. 1951, Ассиро-вавилонские источники по истории Урарту, Вестник древней истории, N 3, с. 207-252.
- Дьяконов И.М. 1956, История Мидии, Москва-Ленинград, изд. АН СССР, 485 с.
- Дьяконов И.М. 1963, Урартские письма и документы, Москва-Ленинград, изд. АН СССР, 144 с.
- Дьяконов И.М. 1981, Малая Азия и Армения около 600 г. до н.э. и северные походы вавилонских царей, Вестник древней истории, N 2, с. 34-64.
- Ельницкий Л.А. 1949, Киммерийцы и киммерийская культура, Вестник древней истории, N 3, с. 14-26.
- Жебелев С.А. 1953, Северное Причерноморье, Москва-Ленинград, изд. АН СССР, 388 с.
- Иванчик А.И. 1988, Воины-псы. Мужские союзы и скифские вторжения в Переднюю Азию, Советская этнография, N 5, с. 38-48.
- Иванчик А.И. 1989, О датировке поэмы «Аримаспея» Аристея Проконнесского, Вестник древней истории, N 2, с. 29-49.
- Иванчик А.И. 1996, Киммерийцы. Древневосточные цивилизации и степные кочевники в VIII-VII вв. до н.э., Москва, «Наука», 324 с.
- Иванчик А.И. 1999, Современное состояние киммерийской проблемы. Итоги дискуссии, Вестник древней истории, N 2, с. 77-97.
- Капанцян Г. 1947, Хайаса – колыбель армян. Этногенез армян и их начальная история, Ереван, изд. АН АрмССР, 290 с.
- Ковалевская В. 1984, Кавказ и аланы. Века и народы, Москва, «Наука», 192 с.
- Мартиросян А.А. 1954, Раскопки в Головино, Ереван, изд. АН АрмССР, 116 с.
- Мровели Л. 1979, Жизнь картлийских царей. Перевод с древнегруз., предисл. и коммент. Г.В. Цулая, Москва, «Наука», 104 с.
- Мурзин В.Ю. 1990, Происхождение скифов: основные этапы формирования скифского этноса, Киев, «Наукова думка», 88 с.
- Пиотровский Б.Б. 1959, Ванское царство (Урарту), Москва, «Восточная литература», 284 с.
- Полиен 2002, Стратегемы, пер. с греч. (ред. А. Нефедкин), Санкт-Петербург, «Евразия», 608 с.
- Пьянков И.В. 2005, Аристей: путешествие к исседонам, Исседон: альманах по древней истории и культуре, 3, с. 15-35.
- Страбон 1964, География, в 17 книгах (ред. С. Утченко), Москва, «Наука», 936 с.
- Diodorus of Sicily 1967 – The Library of History, With an English Translation by C.H. Oldfather, In Twelve Volumes, III, Books IV (continued) 59-VIII, London; Cambridge, Massachusetts, "William Heinemann LTD"; "Harvard University Press", 440 p.
- König F. 1934, Älteste Geschichte der Meder und Perser, Leipzig, Verl. «J.C. Hinrich», VIII+66 S.
- Luckenbill D. 1927, Ancient Records of Assyria and Babylonia, Vol. II, Chicago, Illinois, "The University of Chicago Press", XII+504 p.

- Marquart J. 1901, *Ēranšahr nach der Geographie des Ps. Moses Xorenac'i. Mit historisch-kritischen Kommentar und historischen und topographischen Excursen*, Berlin, Verl. "Weidmannsche Buchhandlung", 373 S.
- Polybius 2010-2011, *The Histories*, Vol. II-IV, Books 3-4, 5-8, 9-15, Translated by W.R. Paton, Revised by F.W. Walbank, C. Habicht, Cambridge, Massachusetts, "Harvard University Press", 576, 624, 640 p.
- Posidonius 1972, *Translation of the Fragments*, Vol. III, L. Edelstein, I.G. Kidd, Cambridge, "Cambridge University Press", 432 p.
- Tacitus 1962, *The Annals*, With an English Translation by J. Jackson, in: Tacitus II, T.E. Page et al. (eds.), Cambridge, Massachusetts, "Harvard University Press", London, «William Heinemann LTD», p. 225-643.
- Xydopoulos I. 2015, *The Cimmerians: their origins, movements and their difficulties*, in: G. Tsetskhladze, A. Avram, J. Hargrave (eds.), *The Danubian Lands Between the Black, Aegean and Adriatic Seas*, Oxford, Pub. "Archaeopress Archaeology", p. 119-123.
- ქართლი სცხოვრება 1955, ქართლისცხოვრება, ტ. I, თბილისი, გამ. «სახელმწიფო», 463 გვ.

ԱՍՏՎԱԾԱՇՆՉԻ ԵՎ ՊԱՏՄԻՉՆԵՐԻ ՏԵՂԵԿՈՒԹՅՈՒՆՆԵՐԸ ՀԱՅԿԱԿԱՆ ԼԵՈՆԱՇԽԱՐՀՈՒՄ ԿԻՄԵՐՆԵՐԻ ՈՒ ՍԿՅՈՒԹՆԵՐԻ ԳՏԿԵԼՈՒ ՄԱՍԻՆ

Գարեգին Թումանյան

Ամփոփում

Կիմերների և սկյութների մասին վկայություններ կան Աստվածաշնչում: Ըստ ժողովուրդների աղյուսակի, Աքքանագն ու Թոգարմա-Թորգոմը Նոյի թոռան և Հաբեթի որդու՝ Գոմերի որդիներն են: Աստված խոստանում է Իսրայելի ժողովրդի դեմ ուղարկել «Գոմերը և նորա բոլոր գունդերը», այսինքն՝ կիմերներին: Բաբելոնի դեմ ուղղված երեմիայի կոչում «Աքքանագի թագավորություն» անվան տակ հասկացվում են սկյութները:

Հունարեն հնագույն աղբյուրներն առասպելախառը տեղեկություններ են հաղորդում կիմերների մասին: Հոմերոսն առաջինն է, որ հիշատակում է նրանց: Ոդիսևսը «մեղյակների թագավորություն» ուղևորվելիս հասնում է օվկիանոսի սահմաններին, որտեղ, հավերժական խավարի մեջ, ապրում են կիմերները: Կիմերները հիշատակվում են նաև եփեսոսցի բանաստեղծ Կալլինոսի էպեգիաներից մեկում և Արիստեսա Պրոկոննեսոսցու «Արիմասպեականք» պոեմում: Ըստ Հերոդոտոսի, կիմերներն Ասիա են հասել՝ սկյութների կողմից դուրս մղվելով իրենց բնակավայրերից, իսկ սկյութներն այդ տարածաշրջան են ներխուժել՝ հետապնդելով փախչող կիմերներին: Քսենոփոնը, Պոլիբիոսը, Պոսիդոնիոսը, Դիոդորոս Սիկիլիացին նույնպես տեղեկություններ են հաղորդել այս ցեղախմբերի վերաբերյալ: Կիմերները և սկյութները հիշատակվել են Ստրաբոնի, Հովսեպոս Փլավիոսի, Պլուտարքոսի, Տակիտոսի, Դիոն Կասիոսի աշխատություններում: Պատմական ասպարեզից սկյութների հեռանալուց հետո էլ նրանց մասին հիշողությունները միանգամից չեն մարում:

Հայ պատմագիրները կիմերներին ու սկյութներին հաճախ դիտում են որպես ազգակիցներ՝ նրանց նույնացնելով հայերի հետ: Կորյունը, խոսելով Հայաստանի աշխարհի և *Աքքանագյան* ազգի աստվածապարզ Գրի մասին, ակնհայտորեն նկատի ունի հայոց ազգը: Խորենացին Նոյի ժառանգներին թվարկում է հետևյալ հաջորդա-

կանությամբ՝ Հաբեթ, Գամեր/Գոմեր, Թիրաս, Թորգոմ, Հայկ: Անդրադառնալով իրեն առավել սիրելի հայոց թագավորներին՝ նա հիշատակում է Սկայորդու որդի Պարույրին, այլ խոսքով՝ սկյութների առաջնորդ Պարտատուային: Սկյութական տարբեր ցեղերի վերաբերյալ տեղեկություններ են հաղորդում Ագաթանգեղոսը, Եղիշեն, Փավստոս Բուզանդը, Սեբեոսը, Մովսես Կաղանկատվացին, Անանիա Շիրակացին: Հայ պատմագրության մեջ սկյութների մասին կան նաև ուշ հիշատակություններ:

Աստվածաշնչի ու պատմիչների հաղորդումները լրացնում են Հայկական լեռնաշխարհում և հարևան տարածաշրջաններում կիմերների ու սկյութների ներկայության վերաբերյալ մեր իմացությունը, ինչպես նաև պատկերացումները նրանց սովորությունների ու կենցաղի վերաբերյալ:

Բանալի բառեր՝ Աստվածաշունչ, Գոմեր, Ասքանազ, կիմերներ, սկյութներ, պատմագիրներ, Հայկական լեռնաշխարհ:

СВЕДЕНИЯ БИБЛИИ И ИСТОРИОГРАФОВ О НАХОЖДЕНИИ КИММЕРИЙЦЕВ И СКИФОВ НА АРМЯНСКОМ НАГОРЬЕ

Гарегин Туманян

Резюме

О киммерийцах и скифах есть свидетельства в Библии. Согласно «Таблице народов», Аскеназ и Фогарма-Торгом являются сыновьями Гомера – внука Ноя и сына Иафета. Бог обещал послать против народа Израиля «Гомера со всеми отрядами его», т.е. киммерийцев. В книге пророка Еремии под словами «царство Аскеназское» подразумеваются скифы.

Древнейшие источники на греческом языке передают полумифические сведения о киммерийцах. Первым о них упоминает Гомер. Одиссей, отправившийся в «царство мертвых», достиг края океана, где в вечном мраке жили киммерийцы. Киммерийцы также упоминаются в одной из элегий поэта Каллина из Эфеса и в поэме «Аримаспея» Аристея Проконнеского.

Согласно Геродоту, киммерийцы, будучи вытесненными со своих территорий скифами, дошли до Азии. Скифы вторглись в этот регион, преследуя киммерийцев. Ксенофонт, Полибий, Посидоний, Диодор Сицилийский также приводят данные об этих племенах. Киммерийцы и скифы упоминаются в трудах Страбона, Иосифа Флавия, Тацита, Диона Кассия.

Армянские историографы часто рассматривают киммерийцев и скифов как соплеменников, отождествляя их с армянами. Так, Корюн говорит «о данном Богом алфавите *Аскеназского* народа» (очевидно, имея в виду армянский народ) и о стране Армении. Хоренаци перечисляет наследников Ноя в следующей последовательности: Иафет, Гамер/Гомер, Тирас, Торгом, Айк. Обращаясь к армянским царям, он упоминает Паруйра – сына Скайорди, т.е. предводителя скифов Партауга. О разных скифских племенах сообщают сведения Агафангел, Егише, Фавстос

Бузанд, Себеос, Мовсес Каланкатвацци, Анания Ширакаци. В армянской историографии есть также поздние упоминания о скифах.

Сведения Библии и историографов восполняют наши знания о киммерийцах и скифах на Армянском нагорье и в сопредельных регионах, а также наши представления об их обычаях и жизненном укладе

Ключевые слова – Библия, Гомер, Аскеназ, киммерийцы, скифы, историографы, Армянское нагорье.

REPORTS OF THE BIBLE AND HISTORIOGRAPHERS ABOUT THE PRESENCE OF CIMMERIANS AND SCYTHIANS IN ARMENIAN HIGHLAND

Garegin Tumanyan

Abstract

There are evidences about Cimmerians and Scythians in the Bible. According to the "Table of Nations", Ashkenaz and Togarmah-Torgom are the sons of Gomer – the grandson of Noah and the son of Japheth. God promises to send against Israelites "Gomer with all its troops", i.e. Cimmerians. In the call of Jeremiah against Babylon, "the kingdom of Ashkenaz" is mentioned, under which Scythians are presumed. Ancient Greek sources report semi-mythical information about Cimmerians. Homer is the first one who mentions them. On the way to the Kingdom of the Dead, Odysseus reaches the River of Ocean, where, in the eternal darkness, live the Cimmerians. Cimmerians are mentioned also in one of the elegies of Callinus – a poet from Ephesus, and in the poem "Arimaspea" by Aristeas of Proconnesus.

According to Herodotus, Cimmerians came to Asia because of being expelled by Scythians from their territories, and Scythians invaded this region pursuing the running Cimmerians. Xenophon, Polybius, Posidonius, and Diodorus Siculus also reported about the abovementioned tribes. Cimmerians and Scythians are mentioned in the works of Strabo, Josephus Flavius, Plutarch, Tacitus, and Dio Cassius. Memories of them are not quickly blown out even after they leave the historical arena. Armenian historiographers often view Cimmerians and Scythians as related to each other, assimilating them with Armenians. Koryun, when talking about the land of Armenia and the God-granted writing of Ashkenaz nation, apparently means Armenian nation. Moses Khorenats'i lists the descendants of Noah in the following order: Yapheth, Gomer/Gomer, T'iras, T'orgom, Hayk. Talking about his favourite Armenian kings, he mentions Paroyr, the son of Skayordi, in other words – Partatua – the leader of Scythians. Information about different Scythian tribes is provided by Agat'angeghos, Eghishe, Pavstos Buzand, Sebeos, Moses Kaghankatvats'i, Anania of Shirak. In Armenian historiography there are also some later reports about Scythians.

The information provided by the Bible and historians add to our knowledge about the presence of Scythians and Cimmerians in the Armenian Highland and the adjacent territories and improve our understanding of their habits and lifestyle.

Key words – The Bible, Gomer, Ashkenaz, Cimmerians, Scythians, historiographers, Armenian Highland.